

四庫全書

史部

欽定四庫全書

史部

江城名蹟卷三

四

詳校官太僕寺少卿臣李廷欽

編修臣程嘉謨覆勘

總校官進士臣朱鈐

校對官祭酒臣鄒奕孝

謄錄監生臣張復

欽定四庫全書

江城名蹟卷三

新建陳宏緒撰

證今

洪都 明初壬寅歲高皇帝定洪都命都督官朱文正  
增拓舊城周二千七十丈有奇高二丈九尺有奇建  
七門東曰永和又名澹臺以門內有澹臺墓舊名壇  
頭門為仙人黃紫庭臺壇址東南曰順化舊名琉璃

以門內延慶寺有晉建武時琉璃佛像在焉南曰進賢舊名撫州俱以道路相通得名又曰望仙以漢梅尉故廨在門外又南曰惠民輓輸至惠民倉其路由此舊名寺步以近隆興寺也西南曰廣潤舊名柴步又名橋步西曰章江以在江濱故名舊曰昌門孫策遣虞翻與郡守華歆交語于此北曰德勝舊望雲門李綱移築于此又名新城 明初御製周顛仙碑云朕于南昌東華門道左見男子一人拜于道傍朕謂

左右曰此何人也左右皆曰顛人按吾郡城門未聞有東華之名豈此時永和門亦稱東華門與

章江 在郡西章江門外水經所謂顛水出豫章是也控引衆流總成一川後漢郡國志曰顛有豫章水雷次宗云似因此水為其地名雖十川均流而此流最遠故獨受名焉十川者贛廬章塗盱蜀餘鄱僚循為十川也緒按豫章自以樹得名次宗之言未為覈實蜀江在新建西南六十里一名筠河自瑞州高安

入境合象牙潭水入章江亦名錦江述異紀云漆澄  
釣于蜀水水中忽得金鎖引之不絕俄頃盈舟既而  
有物出水上黑色不見首尾舟人驚惶惟澄略不變  
色澄豫章人也 盱水出南城縣西北流逕南昌縣  
西南注贛水

東湖 在城內亦名太湖水經注云東太湖十里二百  
二十二步北與城齊南緣迴折至南塘水通大江增減  
與江水同湖至清深魚甚肥美沿隄舊皆植柳名萬

柳隄亦曰萬金隄唐李紳詩菱訝罷唱鷓舟迴雪鷺  
銀鷗左右來霞散浦邊雲錦截月昇湖面鏡波開魚  
驚翠羽金鱗躍蓮脫紅衣紫葍摧浦口值春偏悵望  
數株臨水是寒梅 啟禎間承平既久吾郡又為藩  
封盛地諸王子公侯暨士大夫流連光景縱意遊觀  
忽有開浚東湖之舉一時畫舫蘭橈珠簾翠幙幾與  
西湖爭勝予有東湖詞云萬古空烟月今朝錦纜叢  
柳翻蘇圃浪鳥弄杏花風新調吳吹滿長橋夜火通

滕王歌舞後樂事聖朝工又繡幕流蘇遠誰家翠袖  
過衣香勾舞蝶低笑出深荷載酒輕撓緩聽簫寂坐  
多尚饒草玄客鷗外獨編摩又競架臨湖屋朱欄侈  
此時兩齋誇秀倩三笠較幽竒洗研頻衝雨論文每  
傍祠無人清賞處曉露獨離離又怕魚鹽掉沿洄  
盡勝流西江新韻士寧卽舊諸侯挾瑟蒹葭岼垂鞭  
鳧雁洲為懽若未足醉卧數更籌又孺子祠前水斜  
過吏隱亭昔垂高士釣今伴酒人星燈滿孟蘭社魚



依橋甕萍幾翻看競渡虹影掛香軒又粉垣長帶月  
遙映石欄烟一派瓊瑤蕩四時風露妍樓懸東壁迴  
樹傍斗珠連此地鯨吞快尊空覓釀泉辛稼軒送  
元濟之歸豫章詞名江神子有二月東湖湖上路官塗  
柳嫩野梅香之句南渡以後東湖風景彷彿在目前  
又不特近代遊觀之盛為可誇也今但荒草萋迷求  
一艇一橈不可復得矣明宛平余奕正字司直著  
天下金石志有唐崔璿書洪州東湖記蓋東湖亭記

也遺漏一字遂致失實崔瑋又有洪州刺史王守真  
石碑今俱不知消沉何處

三湖九津 在府城內舊東湖金分為三曰北湖曰東  
湖曰西湖城內之水匯焉湖水出城下水關橋置內  
外閘湖強則直放而西達于江江湖俱強則閉外閘  
使章水不得侵入乃開內閘引湖水達濠遠廣潤章  
江德勝永和四門而過之東歸蜆子湖艾溪湖出牛  
尾閘趨楊家灘入鄱陽湖城內別有九津以殺三湖

之勢廣潤門東曰五行津東南曰五事津

即水關橋

惠民

門下曰八政津進賢門西曰五紀津順化門北曰歸

極津永和門北曰三德津德勝門下曰稽疑津章江

門北曰庶徵津南曰五福津水各由津以歸濠焉

舊傳東湖尾閭龍精守之中有坎諺云海眼深不可

測江漲難于堤扞韋公未遇時適龍精化為白龜為

漁者所得韋見而買置江中後韋官此土龍精見夢

曰予東湖之龍曩者魚服蒙公恩救無由仰報公將

築東湖之尻予且徙居象牙潭以成公績然恐有他  
龍復據必置城隍廟內四金人用四死囚同填其中  
乃永無敗韋公異日如其言即今之五事津也韋公  
疑是韋丹

豫章郡城 雄跨一省山之鎮曰西山屏障西北望曰

羅山

屬豐城

屹峙東南其大川西曰章江東曰撫河匯

為巨浸鄱陽湖大脈三支中為南昌分豐城東河之  
東為進賢西河之西為新建奉靖寧武此其大概也

章江堤 在府城西章江門上下成化間巡視大理卿  
夏時正因江水嚙圻迫于城濠捐官銀伐石修砌未  
竟成化十二年知府祝瀚繼成其績北起龍興觀南  
至南浦橋

周公堤 在府城北德勝門外嘉靖四十二年巡撫都  
御史周相因江水衝沒民居括所屬醵金伐石砌圻  
民德之立亭于北關上名曰周公亭

南塘堤 在郡城西南斗門外漢太守張躬築堤扞江

唐刺史韋丹重修亦名韋公堤 唐陸龜蒙南塘曲

妾住東湖下郎居南浦邊閒臨烟水望認得采菱船

南昌府學 自晉至唐皆建于郡 西宋治平二年知洪

州施元長遷于洗馬池東明堂路西即今之儒學也

舊志止載元虞集興學頌而遺前宋余靖之記與南

宋楊萬里之記予已采入于藝文志又元貞元年吳

文正公澄遊豫章西山憲幕長郝文仲明迎先生入

城請學易清河元文敏公明善時屈在行省掾見先

生問春秋大義數十條願為弟子受業終其身城中  
居官之人請先生至郡學為說修己以敬一章反復  
萬餘言聽者千百人多所感發按此乃吾郡學官佳  
話今人但知陸子靜白鹿洞故事而已 孔子既沒  
魯哀公誅為尼父漢平帝元始元年謚褒成宣尼父  
後魏文帝大和中改謚文宣尼父後周宣帝大象二  
年追封鄒國公隋文帝贈先師尼父唐高宗乾封元  
年贈太師武后封隆道公玄宗謚文宣王宋真宗加

謚至聖文宣王父叔梁紇為齊國公元加封大成至  
聖文宣王加齊國公為啟聖王明嘉靖十年改稱至  
聖先師孔子改啟聖王為啟聖公自十哲而下及門  
弟子舊有封號者俱改稱先賢某子餘配享者稱先  
儒某子 洪武癸酉崇仁學訓導羅恢上疏言孔子  
廟廷從祀者當以道學論當時有若優于宰予論語  
記有若言行者四皆有裨于世教記宰予者亦四皆  
見責于聖人宜以有若居十哲而宰予居兩廡疏上



不報時皆服其議論之當附載于此 宋北山程至  
道云嘗觀浮屠氏自釋迦佛傳心法與夫講解之宗  
至于今將二千年而源派譜牒一一可數下至醫巫  
祝卜百工之技莫不有所師惟吾儒師承之道乃今  
蔑焉無聞所謂學宮師弟子如適相遇于塗爾蓋可  
嘆也 賜書樓在明倫堂北都御史韓雍建高三丈  
許藏書其上學士錢習禮有記 郡庠司教鐸而稱  
名臣者豐城朱善鄞縣黃潤玉南昌鍾甬也朱善字

備萬以薦辟歷文淵閣大學士有送翰林典籍羅原奎序云洪武十年春善與江西教官同赴召者十有二人而居翰林者惟善與羅氏原奎劉氏仲質三人馬時學士宋公新以承旨致仕歸里于是善以修撰典誥命原奎與仲質以典籍掌書冊先是內府羣書秘書監寶典之九年冬始命移置翰林內直之署實在奉天門之左凡為書數萬卷云

南昌縣儒學 在東湖之北即故東湖書院也宋嘉定

四年通判豐有俊得李寅涵虛閣故址遂請于權府  
計使胡槻創書院以館四方游學之士後計使滕強  
恕兼府事稍徙東二百餘步元元統中縣尹程大度  
更于撫州門外創縣學明洪武初知縣黃德銘遷建  
于此景泰四年巡撫都御史韓雍重修并于明倫堂  
後創魁星樓正德末焚燬隨復建萬厯間知縣林應  
訓鬻民居并嚴氏沒產增拓東隅三十五年知府盧  
廷選知縣周起元濬學前湖址四圍砌石成堤以壯

學宮形勝近燬于兵巡撫兵部尚書蕪都御史張公朝璘督學楊公兆魯捐俸重建 明胡儼記略云豫

章之學宗雙峯饒氏雙峯得之李弘齋弘齋則溯紫陽朱子以續夫濂洛之傳者也初勉齋黃公為新建丞與弘齋講學于茲極論道德性命之旨當是時雙峯實從弘齋而與有聞焉雙峯之學傳之徽庵程氏徽庵之學傳之吳文正公其所以開來學者實肇于此諸君子之接踵從游者可不知所重哉 洪武已

知南昌縣儒學掘泮池得二石獅子無鼻學傍兒戲  
以硃塗之是年劉瑞王高同舉並坐方孝孺事劓鼻  
而終

新建縣儒學 在東湖之北即故宗濂書院也初望雲

門外

即今德勝門

龍沙岡有宗濂精舍宋淳祐二年知隆

興府江萬里建祀濂溪周子元元統初縣尹薛方即

其地建縣學後別創宗濂書院于東湖上明洪武五  
年改書院為儒學景泰四年巡撫都御史韓雍檄修

并創宗濂書樓萬厯間知府范涑知縣余夢鯉戴士  
衡增葺三十五年知府盧廷選知縣吳嘉謨濬學前  
湖址四周砌石成堤以壯學宮形勝又創梅子真亭  
于湖之西偏以固水口天啟五年知縣龍文光再新  
之弘緒為記歲戊子燬于兵亂提學僉事武進楊公  
兆魯請于巡撫侍郎某公廷佐各捐俸金贖鍰并檄郡  
丞高公培重建楊有修學碑記 胡頤菴先生儼學記  
云宣德七年巡撫吏部侍郎趙公合藩臬及郡邑長

吏慨然以教育人才為事聿新學宮自禮殿達于門  
廡自講堂及于齋舍暨藏修之室靡不輪奐增美傑  
出于湖光天影之間按所謂趙公者乃杭州趙公新  
也由太學生歷官至吏部侍郎江右以少宰巡撫者  
僅公一人初莅吾省尚循朱文正故事稱鎮守後乃  
改為巡撫至成化間原傑金紳亦以侍郎至則并稱  
巡視云 江丞相祠舊在新建縣學東廡下祀宋丞  
相江萬里

城隍廟 在府東南直深三十八丈橫濶二十六丈舊廟在郡子城東洪武三年知府趙文奎移建于此正德間知府胡本惠重修張房傑記景泰間知府蘓仕宣修韓揚記萬歷間知府范涑復修兩廡涑自記文多俱不錄 府城隍相傳為漢灌嬰考通志西漢初嬰嘗定豫章始築郡城故祀以為神即今灌城鄉實始于此漢高帝六年封潁陰侯南唐時封輔德王宋淳祐八年封忠惠王洪武三年令天下城隍廟止稱



某府州縣城隍之神悉革封號塑像凡祭風雲雷雨  
山川則神配享祭厲壇則神主之載在祀典 南昌  
諸生劉端世稱古岡先生為諸生時肄業邑校偶夜  
半過城隍廟廟內神語曰過門者乃忠臣也令舉火  
送之直抵學宮而退次日司廟門者徃邑校詢知為  
端拜而賀之端以為誕後果驗 江西左轄黃公卿  
清白自持卒于官市人有夢鼓吹迎新城隍者諦觀  
之乃方伯黃公也公卒適符所夢之期果爾則城隍

非復灌將軍矣

社稷壇 在德勝門外俗稱北壇洪武間知府趙文奎  
自城西北遷建歲春秋二仲月上戊日致祭

風雲雷雨山川壇 在進賢門外俗稱南壇洪武間知  
府趙文奎改建歲春秋二仲月上巳日致祭

郡厲壇 在德勝門外洪武三年始頒降禮制每歲春  
清明秋七月十五日冬十月一日致祭

旗纛廟 每歲霜降都司致祭

永寧寺 一名上藍寺在崇梵坊初郡故子城西有蛟

井在梁豫章王師葛鱣宅東南天監中龍闕井中豫

章王蕭綜造大佛鎮之鱣復于太清初捨宅名大佛

寺唐開元間改為開元寺有唐明皇銅像號真容殿

大厯間馬祖建道場于此大中間燬後南平王鍾傳

奏復建為上藍院以居上藍山僧令超宋真宗時改

承天寺政和間改能仁寺明初以寺址荆南昌縣治

遷寺于元故帝師殿

即鍾傳之故居

景泰間更名為祝釐

習禮之所有藏經閣萬厯間建 江西道一禪師漢

州什邡人也姓馬氏本邑羅漢寺出家形容奇異牛  
行虎視引舌過鼻足下有二輪文幼歲依資州唐和  
尚落髮受真于渝州圓律師唐開元中習禪定于衡  
嶽山中遇讓和尚同參六人惟師密受心印始自建  
陽佛跡嶺遷至臨川次至南昌龔公山大厯中隸名  
于鍾陵開元寺時連帥路公嗣恭親授宗旨由是四  
方學者雲集座下入室弟子一百三十九人各為一

方宗主轉化無窮師于貞元四年正月中登建昌石  
門山于林中經行見洞壑平坦謂侍者曰吾之朽質  
當于來月歸茲地矣言訖而回既而小疾院主問和  
尚近日尊候如何師曰日面佛月面佛二月一日沐  
浴跣跌入寂元和中謚大寂禪師塔曰大莊嚴 百  
丈山懷海禪師與西堂智藏南泉普願同號入室時  
三士為角立焉 明州大梅山法常禪師初參大寂  
問如何是佛寂曰即心即佛師即大悟遂之四明梅

子真隱處縛茅燕處馬祖聞師住山乃令僧問和尚  
見馬大師得箇甚麼便住此山師曰大師向我道即  
心即佛我便向這裏住僧曰大師近日佛法又別師  
曰如何僧曰又道非心非佛師曰這老漢惑亂人任  
他非心非佛我祇管即心即佛其僧回舉告馬祖祖  
曰梅子熟也 伊闕伏牛山自在禪師參祖求發明  
心地後居伏牛山上堂曰即心即佛是無病求藥句  
非心非佛是藥病對治句僧問如何是脫灑底句應

曰伏牛山下古今傳 亮座主蜀人也頗讀經論因  
參馬祖祖問見說座主大講得經論是否師曰不敢  
祖曰將甚麼講師曰將心講祖曰心如工技兒意如  
和伎者怎講解得師抗聲曰心既講不得虛空講得  
否祖曰却是虛空講得師不肯服便出將下階祖召  
曰座主師回首祖曰是甚麼師豁然大悟便禮拜祖  
曰這鈍根阿師禮拜作麼師曰某常所講經論將謂  
無人及得今日被大師一問平生功業一時水釋禮

謝而退乃隱于洪州西山更無消息 陸放翁言其  
從子慧綽為浮屠傳豫章西山香城寺之傍有楚人  
身被綠毛每雨霽多坐石上暴日見人輒避去追之  
不可及有識者曰此馬祖弟子亮座主也 襄州居  
士龐蘊者衡州衡陽縣人字道玄從石頭來參馬祖  
問曰不與萬法為侶者是甚麼人祖曰待汝一吸  
盡西江水即向汝道士于言下頓悟玄旨乃留駐參  
承二載有偈曰有男不婚有女不嫁大家團欒頭共



說無生話自爾機辨迅捷諸方嚮之

已上南嶽下二世馬祖一禪師

法嗣

鄧州丹霞天然禪師本習儒業將入長安應舉方

宿于逆旅忽夢白光滿室占者曰解夢之祥也遇禪者問曰仁者何往曰選官去禪者曰選官何如選佛曰選佛當往何所禪者曰今江西馬大師出世是選佛之場仁者可往遂直造江西纔見馬祖以手拓撲頭額祖顧視良久曰南嶽石頭是汝師也遽抵石頭剃髮又為說戒再往江西謁馬祖未參禮便入僧堂

騎聖僧頭而坐時大衆驚愕遽報馬祖祖躬入堂視之曰吾子天然師即下地禮拜曰謝師賜法名因名天然 令超禪師唐末住高安上藍寺及鍾傳為南平王迎至洪州住開元寺仍以上藍名焉僧問如何是上藍本分事師曰不從干聖借豈向萬機求曰祇如不借不求時何如師曰不可拈放汝手裏問善財見文殊後為甚麼却住南方師曰學憑入室知乃通方曰彌勒為甚麼却遣見文殊師曰道廣無涯逢人

不盡至唐大順正月初告衆曰吾本約住此十年今  
化事既畢當即行矣齋畢聲鐘端坐長往謚元貞禪  
師 禾山無殷禪師從雪峰出家依之後具謁九峰  
許以入室南唐李主昇召見特蒙禮遇嗣主璟賜號  
澄源命居洪州翠巖時上藍亦虛其室仍命師來往  
闡化建隆元年示寂有甘露被樹皓鶴盤空之異  
上藍院光寂禪師青原下稱心明之法嗣也上堂橫  
按拄杖召大衆曰還識上藍老漢麼眼似木突口如

扁擔無問精粗不知鹹淡與麼住持千百過犯諸禪  
德還有為山僧懺悔底麼良久曰氣急殺人卓拄杖  
下堂 法燈禪師住南昌上藍雲居齊禪師往依之  
法燈便知莊司燈偶見齊呼曰每見祖師西來意話  
莊司如何商畧齊曰不東不西燈曰若與麼會了無  
交涉曰未審尊意如何燈良久曰西來有甚意便去  
齊于是頓悟其旨 上藍寺石閣貯大藏經一部萬  
歷初古心禪師道安所建也閣有接引佛像範金為

之崇十有六尺莊嚴甲于諸刹 閣後有老君殿或  
謂無生法侶而祀柱下史殊為不倫予考仙傳呂巖  
始在襖襦馬祖見之曰此兒骨性不凡自是風塵表  
物他時遇廬則居見鐘則扣留心記取後遊于廬山  
始遇大龍真人傳天劍遁法因號純陽子咸通中舉  
進士時年六十四偶遊長安酒肆遇羽士狀貌奇古  
乃鍾離權也遂授以靈丹并靈寶異法至今在世行  
化度人是則純陽亦馬祖授記而登仙此地固不獨

為選佛之場也老子之祀其或以純陽之故歟 五

燈會元載純陽為青原下八世黃龍機法嗣嘗以偈  
呈黃龍云棄却瓢囊碎却琴如今不戀承中金自從  
一見黃龍後始覺從前錯用心其解悟超脫如此惜  
遇馬祖時方在襁褓之中悠悠百餘年尚不免飛劍  
一錯 洪州太守許式參洞山得正法眼一日與泐  
潭澄上藍溥坐次澄問聞郎中道夜坐連雲石春栽  
帶雨松當時答洞山甚麼話公曰今日放衙早澄曰

問答泗州大聖在揚州出現底是否公曰別點茶來  
澄曰名不虛傳公曰和尚早晚回山澄曰今日被上  
藍覲破溥便喝澄曰須是你始得公曰不奈船何打  
破岸斗明太祖入南昌城微行至能仁上藍禪寺  
周遊細玩傍若無人僧叩其姓名不答固叩之乃題  
殿壁曰殺盡江西數萬兵腰間寶劍血留腥野僧不  
識山河主只管叨叨問姓名題畢擲筆竟出一雲遊  
僧見而磨去更題曰御筆題詩不敢留留時惟恐鬼

神愁好將法水頻頻洗猶有毫光射斗牛翌日上欲  
加罪此寺見所題詩曰寺固有人遂赦僧衆 唐時  
寺僧栖隱少而端麗神解天然出塵後服勤于學深  
入毗尼壺奧又兼擅風雅每于花朝月夕晚照高秋  
鍊句成聯合篇為集往往適健瀏亮散在人口居常  
與貫休處默修睦為詩道之友處士沈顏曹松張凝  
陳昌符皆其倡酬之友也詩集百餘首曰桂峰集近  
代等可禪師行溥吾邑西山農家生子夢老僧持菊



至室中曰我貫休也遂名休兒五六歲出家于此其  
師富資財等公獨好筆墨作小詩自喜遂惡之蜀僧  
過永寧寺等公奪其扇題曰老師問我西來意般若  
波羅上大人蜀僧大奇之已遍遊名勝著北遊草五  
百餘首舟過泖湖遇盜并其詩盜去等公曰吾生平  
悔作詩偷兒愛我後友人劉文學不息梓其僅存之  
稿百十五首等公自署曰棗堂剝語吾宗伯機選刻  
詩慰集中 東山寺唐慧禪道場宋大中祥符中禪

僧修演建寺寺有卧如來像今并入永寧寺

大安寺 在城北初名東寺有鐵香爐高六尺許識云

赤烏元年造晉時西域僧安世高來止于此遂名大

安寺

一云晉隆安二年鎮西將軍謝尚施宅為之

唐武德間改名宣明寺

大中間又改名普濟寺明初重建復今額 安清字

世高安息國王子也幼以孝行見稱又加志業聰敏

刻意好學外國典籍及七曜五行醫方異術乃至鳥

獸之聲無不綜達嘗行見羣燕忽謂伴曰燕云應有

送食者頃之果有至焉衆咸竒之儻異之聲早被西域讓國出家修道博曉經藏尤精阿毘曇學既而遊方遍歷諸國以漢桓初年到中夏通習華言宣譯諸經多有神跡自稱先身已經出家有一同學多嗔值施主稍不稱意輒懟恨之高屢加訶諫終不悛改如此二十餘年乃與同學辭訣云我當往廣畢宿世之負卿明經精勤不在吾後而性多恚怒終當受惡形我若得道必當相度既而適廣州值寇亂道逢一少

年唾手挾刃曰真得汝矣高笑曰我宿命負卿遠來相償卿之忿怒故是前世特意也乃延頸受刃容無懼色少年殺之觀者填陌莫不駭其奇異後神機還原為安息王太子遊化中國值靈帝末關洛擾亂乃振錫江南云我當過廬山度習同學行達却亭湖廟此廟舊有威靈商旅祈禱能分風送船上下各無留滯嘗有乞神竹者未許輒取舫即覆没竹還本處自是舟人敬憚莫不懾影高同旅三十餘船奉牲請福

神乃降祝曰舫有沙門可便呼上客咸驚愕請高入廟神告高曰吾昔外國與子俱出家學道好行布施而性多嗔怒今為却亭廟神周迴千里並無所治以布施故珍玩甚豐以嗔怒故墮此補報今見同學悲欣交集壽盡旦夕而醜形長大若于此捨命穢汚江湖當度西山澤中此身滅後恐墮地獄吾有絹千疋并雜寶物可為立法營塔使生善處也高曰遠來相度何不出形神曰形極醜異衆人必懼高曰但出衆

不怪也神從牀後出頭乃是大蟒不知尾之長短至高膝邊高向之梵語數番讚嘆數次蟒悲淚如雨須臾還隱高即取絹物辭別而去舟侶颺帆蟒復出身登山而望衆人舉首然後乃滅倏忽之頃便達豫章即以廟物為造東寺高向暮渡江此時忽有一少年上船長跪高前受其呪願忽然不見高謂船人曰茲之少年即却亭廟神得離惡形矣于是廟神無復靈驗後人于西山澤中見一死蟒頭尾數里今潯陽郡

蛇村是也

普賢寺 在惠民門內晉故禪居寺隆安四年武昌太

守熊鳴鵠

一作鳴鵠

捨宅建至唐神龍元年改為隆興院

亦稱隆興寺于是惠民門亦曰寺步門以其與寺相近也會昌間觀察使裴休迎黃蘗山希運禪師居此南唐保大二年袁州刺史邊鎬以鐵二十萬斤鑄普賢乘白象寺遂以普賢名明永樂中重建黃蘗希運禪師閩人也幼于洪州黃蘗山出家額間隆起如

珠音辭朗潤志意冲澹遊京師因人啟發乃往叅百丈一日丈問師甚麼去處來曰大雄山下採菌子丈曰還見大蟲麼師便作虎聲丈拈斧作斫勢師即打丈一擲丈冷冷而笑便歸上堂曰大雄山下有一大蟲汝等諸人也須好看百丈老漢今日親遭一口裴相國鎮鍾陵建大禪院請師說法以師酷愛舊山還以黃蘗名之公一日拓一尊佛于師前跪曰請師安名師名曰裴休公應諾師曰與汝安名竟公禮拜一



日請師至郡以所解一編示師師接置于座略不披  
閱良久曰會麼裴曰未測師曰若便恁心會得猶為  
較勝若便形于紙墨何有吾宗裴乃贈詩一章曰自  
從大士傳心印額有圓珠七尺身挂錫十年栖蜀水  
浮杯今日渡章濱一干龍象隨高步萬里香花結勝  
因擬欲事師為弟子不知將法付何人師亦無喜色  
自爾黃蘗門風勝于江表矣大中四年師寂賜謚斷  
際禪師 唐鍾陵隆興寺僧清徹不知何許人也周

遊津肆密護根門初新吳開元寺北院道恒律師深  
談理致憲宗元和八年癸巳約志著記二十卷亦鳩  
聚諸家要當之說解南山鈔號集義焉豫章武昌晉  
陵講士多得此義

延慶寺 在順化門內晉元帝時得琉璃佛像詔建寺  
以處之名琉璃寺唐咸通二年觀察使嚴譔表請重  
建因延慶節奏上改名延慶順治二年燬于兵僧淨  
鍍復新之 南唐徐鉉有延慶寺碑其略云晉元帝

即位之歲郡人有耕于東湖之良隅者獲琉璃像焉  
其高三尺其狀殊異守臣上啟詔立寺以處之至唐  
太和三年文宗以夢寐交感特詔修崇有僧普願者  
率勵衆力剏造飛閣極高明之制盡臨觀之美瞻仰  
之徒勝賞仍在會昌沙汰旋復殄夷時有寺住僧神  
確躬奉端容瘞于堂下大中改制將復修完像遂湮  
沒求不可得而靈跡所在羣心未忘咸通二年連帥  
嚴譔表請重建因紀誕聖之節署為延慶之寺廣明

中巢寇亂遂羣賊蜂起三灾所及寺復焚燬光啟二  
年廉使王師甫即其故址又加營繕自是厥後百載  
于茲市朝屢更興廢不一及國家奄有寰區恢弘教  
法北藍寺監守寺僧智清推成以化人節用以成務  
峻其卑庠葺其傾頽改作正殿及廊廡共七間踈楹  
廣廈雕甍藻稅鎖窓洞户珠網金鋪塞產鴻紛塗泥  
煥爛闕政備矣能事畢矣 弘緒過延慶寺晤成中  
上人詩十年不過城東寺重構香臺歷幾秋亂後禪

燈依約在老來筇杖委蛇遊榴花作雨胭脂冷竹影  
連雲翡翠浮話到無生諸累盡只難消遣卻平愁

浴室寺

在永寧寺東相傳馬祖創建蓋沐浴之所也

戊己變後予入郭首過其處見荒葛滿塗不勝紛濁  
之感作江城懷古六十首遂以茲寺為冠予友黎左  
巖學使既成和章復作募䟽重新之僧逢祖鑿小池  
種花環繞額曰醉花池一時名流俱有題詠或謂醉  
花非僧所宜呂道州不云乎君看池水湛然時何曾

不受花枝影上人之醉固即如來之微笑矣

繩金塔寺

在進賢門外舊名千佛院唐天祐間建有

繩金寶塔相傳建塔時掘地得鐵函劍三金瓶舍利

三百俗名塔下寺舊有趙松雪碑郡人推為墨寶

繩金塔初建時尚在城中舊記稱此塔能厭火災豫

章民謠云藤斷葫蘆剪塔圮豫章殘蓋謂潮王洲舊

有閣與滕閣並時後忽傾倒于是進賢門外古城如

葫蘆形者遂截出在外改作今城矣頃歲戊己之變

相輪漸偏不可不加意預防也 潘興嗣記塔寺羅

漢云西山雲堂院有禪月大師貫休畫十六羅漢像  
歲旱民奔走山谷間請禱輒應此本天下奇偶數而  
傳之者未有彷彿予捐俸錢使徧模繩金塔院壁間  
輒冀民之祈禱者得以便焉 市林寺晉泰始六年

建今併入塔下寺 明吳國倫詩古塔峻嶒萬象蟠  
西山如鷲捧危欄扶筇漸與彌天近引筏新知覺路  
寬雙樹影迴平野暮百鈴聲徹大江寒毫光夜夜凌

金匱山志卷三  
無極併作南州斗氣看

章江寺 在章江西岸沙井渡口舊名章江禪院

宋潘慎修記

明洪陽張位記

泰定寺 在德勝門外劉上寶斯瑋重建結放生社臨

川陳際泰序

下泰定寺 在龍光寺右

石亭寺 在章江門外唐時僧靈徹建仰山慧寂禪師



于此演教初名大悲寺又名觀音院唐時韋公丹觀  
察西江與寺僧靈徹為忘形交常寄徹詩云王事紛  
紛無暇日浮生冉冉只如雲已為平子歸休計五老  
峯前必共論徹答云年老身閒無一事麻衣學坐只  
容身相逢盡道休官好林下何曾見一人 後立韋  
丹遺愛碑于寺左覆以石亭至大中十五年丹子宙  
復觀察西江奏以為石亭院裴休題額宋政和間廢  
為觀明初復為寺亦稱石亭觀音院明嘉靖年間巡

撫都御史汪玄錫再加修葺有殘碑尚存寺左

國朝順治十五年巡撫都御史張公朝璘清拓舊基捐  
貲重砌寺後左右甃砌圍墻前砌石墀後建觀音大  
殿前建釣天閣與滕王閣並峙左建張公祠右建僧  
房以延賓客丹雘煥然遊觀接踵并捐置贍田八十  
餘畝以供香火 按僧靈徹生于會稽本姓湯氏字  
澄源與吳興詩僧皎然遊皎然薦之包佶李紆以是  
上人名由二公而颺而韋公倡和之句尤為世所爭

傳 韋在洪都又有懷西林慧永禪師詩云空山泉  
落松窓靜閒地草生春日遲白髮漸多身未退依依  
長在永禪師武陽拔俗之致徃徃形于篇什匪特寄  
靈徹之句也 仰山慧寂通知智禪師韶州懷化葉氏  
子年九歲于廣州和安寺投通智師出家十四歲父  
母取歸欲與婚娶師不從遂斷手二指跪至父母前  
誓求正法以答父母劬勞父母乃許再詣通智而得  
披剃初謁耽源已悟玄旨後參瀉山遂升堂與一日

有梵師從空而至師曰近離甚處曰西天師曰幾時  
離曰今早師曰何太遲曰遊山玩水師曰神通遊戲  
則不無閣黎佛法須老僧始得曰特來東土禮文殊  
却遇小釋迦遂出梵書貝多葉與師作禮乘空而去  
自此人號師小釋迦師往觀音院即石亭寺時出榜云看  
經次不得問事有師來問詢見師看經旁立而待師  
卷却經問會麼曰某甲不看經怎得會師曰汝已後  
會去在其僧到巖頭頭問甚處來曰江西觀音來頭

曰和尚有何言句僧舉前話頭曰這個老師我將謂  
彼故紙埋却原來猶在再遷東平將順寂說偈曰年  
滿七十七無常在今日日輪正當午兩手攀屈膝言  
訖以兩手抱膝而終洪州觀音院從顛禪師泉州人  
僧問如何是觀音家風師曰眼前可取曰忽遇作者  
來作麼生見侍曰貧家祇如此未必便言歸問久負  
沒絃琴請師彈一曲師曰作麼生聽其僧側耳師曰  
賺殺人太平興國中無疾坐化建塔西山 明王守

仁夜舟泊石亭詩廿年不到石亭寺惟有西山只舊  
青白拂掛墻僧已去紅欄照水客重經沙村遠樹凝  
春望江雨孤蓬入夜聽何處故人還笑語東風啼鳥  
夢初醒

總持寺 在進賢門內唐開元中建舊名總持院有碑  
刻乾符二年牒中和五年牒各一通寺內有雷公堂  
又有龍井祈雨屢驗 周益公必大記云乾道庚寅  
四月泛舟過總持院本唐僧子畋所造畋精太乙術

能祈雨乞晴今有井禱求不廢雷堂之後有澹臺滅  
明墓洪駒父云史記雖云滅明居楚又有渡江斬蛟  
之事然豫章非真楚尚可疑也平江亦有澹臺墓院  
中老僧年七十及從徐師川遊能寫字鼓琴自總持  
過講武亭登舟按子畋乃唐僧而盧志云元大德間  
僧不知益公錄中已有子畋其人矣院中老僧能解  
寫字鼓琴又與徐師川遊應非尋常衲子今其姓名  
無傳尤為惋惜 吾兄孝廉維謙字仲容讀書寺中

時執高古人如其文嘗作文誌曰負總持山右遠府  
治川分東湖嘉樹環之弱葦竹箭蔓草俯仰蒙綴水  
清以旋日月之光時入而波不波而平王孫甲第雲  
連笙歌時落西望峻者厭原如鋸蘓公祠漫坻中折  
岬而陽漢高士亭東行數武澹臺古墓弟子已莖衣  
冠湖上曲徑深峭行幽峭地立高美樓以祠見羅李  
先生是執也則高美樓與諸兄弟歲月所得者也移  
自龍沙故曰龍沙然則予雖面空主持世道之契立



矣余雖執執仁義名節之警心也久矣丁巳仲冬陳  
維謙書 仲容與其弟仲來名維恭俱為艾溪工丈  
章敦氣誼之士曩予數過總持見仲容所輯成弘以  
來時執疊置烏皮連屋蔽牖艾千子文定文待諸選  
所未及也咸陽一炬灰飛烟滅三百年作者心血遂  
盡于此為之於邑

百福寺 在繩金塔之東宋建 明熊大司馬明遇詩  
仙梵曾聞共一堂青牛白象儼西方郊原抱郭開初

地鐘鼓繙經供法王花木禪房春寂寂旃檀寶閣曉  
蒼蒼門題百福嘉王舊泛作慈雲蔭豫章

天寧寺 在德勝門外舊名孝光寺元薩都拉過孝光

寺詩云秋日留題翠壁層出山聊聽在山僧肩輿又

上沙頭渡隔水人家兩岼燈薩字天錫元統中遷閩

廉訪司知事詩應作于此時胡元瑞曰天錫誦法青

蓮如海嶂連雲起江湖入市流故廬南雪下短褐北

風前夜卧千峯月朝飡五色霞朔風吹夜草寒日下

邊城句法宏整在大歷元和間殊不多得 閩友林  
祖鼎嘗遇茲寺適有艷婦至寺僧某以目挑之俄攜  
手入室林見大加詆訶某僧遂出不遜語予過寺題  
二絕于壁間有禪房寂寂啼烏靜紅雨香風動綺羅  
之句某僧負愧向祖鼎謝過託為洗去後果悔懺前  
愆精持戒律憶黃魯直袈裟頌云丈夫出家當被壞  
色衣蜀僧袈裟多似苾芻尼輕羅縠縠染成春柳絲  
撩蜂引蝶惟欠遠山眉不意真有遠山眉也吾輩遇

此固當金剛弩目以護之

菩提寺

在城東每歲迎春于此

太定寺

在德勝門外劉尚寶斯璋重建結放生社于

此每月一舉臨川陳大士有放生會序大士不觀釋

典獨以儒者愛物之理諄切言之亦足與魯公碑競

美也 雲棲禪師放生之法不拘時日見即買放于

某月下書某日放生若干巨生以個數計細生以觔

數計歲終總算存以自考此法最善可免奸人預捕

急售附記于此

龍光寺 在城北龍沙岡三面積沙蜿蜒擁抱南有蓮  
花池池水澄瑩不受沙侵一郡好為奇勝布政使陸  
長庚丁繼嗣建公館于左郡文學結社課藝若為禪  
堂張公壽朋題曰沙佛居大通禪師說法其中禪師  
名無來南城人為諸生才名籍甚俄削髮出家持戒  
精嚴專提楞嚴甚深微妙之旨慧辨無碍建安豈軒  
王頻枉駕訪之侍郎徐公作御史李公曰輔皆居士

中之高足也著有大通禪師語錄 明劉冢宰崧賦

龍沙贈友人別云朝出城北門遙見城下沙簌簌鳴  
北風蕭蕭入人家波陀皓如雪漫漫不可越水落黃  
金澄天晴紫烟滅別君沙下亭逝此歌揚舲春來倘  
相憶芳草是中青 譚元春詩誰使龍沙立周遭繚  
作墻古蛟聲嘿嘿野鶴倚荒荒徙去終依寺吹來不  
礙塘我同遙集士疑信到斜陽 龍沙讖相傳許真  
君上昇所留其言曰吾仙去後千二百年當出

弟子八百師在豫章宋潘興嗣詩云五陵無限日密  
視龍沙記龍沙雖未合氣象已靈異昔時蛟龍湫半  
作桑麻地地形帶江轉洲浮有連勢陵谷豈可常淵  
實在何歲微生久慕道恬淡輒忘味愧無及物功碌  
碌恒匏繫生蒙塵土厚未受神仙祕何時與孤鶴冉冉  
從此逝

應天寺 在進賢門內唐啟光元年建一名掬林寺相  
傳有掬林禪師禱雨大著靈驗因改名應天宋文丞

相天祥重新之

興福寺 在城南宋悟寬禪師講經于此有白蛇來聽

圓覺寺

在蓼洲晉泰始七年建內有大觀樓張元禎

題扁今不存

蓼洲即古鞬洲北堂書鈔云豫章

城西南有鞬洲去度支步可二里是呂蒙作句鹿

大扁處水經注贛水逕谷鹿洲舊作大扁處按谷鹿

即鞬洲之謠廣雅云船也音鈎鹿 大觀樓舊有詩

集姑蘓杜庠為之序庠詩云南浦北邊圓覺寺西山



東面大觀樓乾坤上下不知極今古去來無盡頭斗  
酒江湖餘老興鳴鑿歌舞一浮漚史官楣扁題方了  
喜見先登二岳侯時周王二方伯過訪故結語及之

慈雲菴

在永和門內豫章城中無田惟慈雲庵傍平

疇數畝殊有郊野之致兵後廢為荒隴 弘緒詩城

東華厦多朱門丹雘炫爛搖晨暎臂弓腰箭旃裘滿  
烈火蕩盡雲霞村蓬蒿影裏鷓鴣吻出古屋還遮斑駁  
佛琉璃燈光半欲無黠鼠白晝圍僧膝病樵輟斧聊

一到恍記當年醉殘照清水三山幾變更老人營咳  
如鴉聲

生生庵 在洪恩橋內有湖上亭崇禎間李少文司理  
嗣京建自為記華亭陳徵君繼儒為之跋板蕩迄於  
梵天此亦招提之魯靈光矣 有蜀僧住持頗久戊  
己江城之變日擊圍城中事每日午陰風黯淡健兒  
持鈎倚樓簷以伺見道上行人或數輩連臂而過輒  
舍去或孤行無侶則鈎取屠割人皆饑甚氣僅如絲

屠割時不能號呼呀然一聲則肢體狼藉几上矣今  
子遺落落晨星皆鈎取之餘肉也司牧者其幸多方  
而生全之

西方庵

在裏洲黎學使元寬重建

沙塘庵

在進賢門外大司馬熊公明遇建有記

妙濟萬壽宮

在廣潤門左故子城之南晉時建祀旌

陽令許真君遜宮左有井與江水相消長中有鐵柱

許旌陽所鑄

西山雙嶺前  
亦有鐵柱一

以鎮蛟螭之患唐咸通中

額曰鐵柱觀宋大中祥符間賜名景德觀政和八年  
改延真觀嘉定中御書額鐵柱延真之宮明壬寅初  
春高帝至龍興過鐵柱觀嘉靖中賜今名萬曆二十  
八年燬復建前有勅書亭後有玉皇閣 仙傳云真  
君諱遜字敬之南昌人生而穎悟博極羣書從吳猛  
得神仙秘法卜居西山下有售鐵燈檠者知為金而  
還之里人化馬太康元年任蜀旌陽令後以晉室將  
亂棄官而歸送而從之者如營壘今許家營是也

南昌縣長亭鄉許仙村乃真君故居吳赤烏二年已  
未母夫人夢金鳳啣珠墜于掌中翫而吞之因而有  
娠正月二十八日辰時生真君勾曲山遠遊君邁護  
軍長史穆皆真君再從兄弟也至晉孝武帝寧康二  
年甲戌八月朔旦有雲仗忽自天而下二仙乘輦降  
庭宣玉皇詔曰上詔學仙童子許遜卿在多劫之前  
積修至道勤苦備悉經緯愈深萬法千門罔不涉歷  
救災拔難除害蕩妖功濟生靈名高玉籍衆真推仰

宜有甄昇可特授九州都仙太史高明大使賜紫衫羽袍瓊旌寶節玉膏金冊各一合詔至奉行真君再拜登階受詔一仙曰余乃玉真上公崔子文一仙曰余乃元真上卿段丘仲告真君以冲舉之期遂乘雲車而去是月望日大營齊會少長畢至日中遥聞音樂之聲祥雲四佈羽蓋龍車從官兵衛仙童絳女前後導從二詔使復至又宣玉皇之詔乃揖真君昇龍駕命陳勲時荷持策前導周廣曾亨驂御黃仁覽與

其父族侍從盱烈與其母部從仙者四十二口同時  
昇舉鷄犬亦隨飛騰留下修行鐘并一石函曰世變  
時遷即為陳迹聊以為記 宋徽宗政和中降玉冊  
上尊號曰神功妙濟真君改觀為宮仍加萬壽二字  
真君慮後世奸雄妄作乃因鐵柱以為讖記有鐵  
柱鎮洪州萬年永不休八索鈎地脉一泓通江流天  
下大亂此地無憂天下大旱此地薄收地勝人心善  
應不出奸謀若有奸謀者終須不到頭之句 又預

識云吾仙去後一千二百四十年間豫章之境五陵之內當有地仙八百人出其師出於豫章大揚吾教郡江心忽生沙洲掩過沙井者是其時也 真君嘗

言此地水陸衝要人物繁夥豈無分合得仙之人試以丹藥數粒雜他藥貨之令其信緣而取既而買者雖多竟無一人得遇真君吁嘆以世間仙才之難得也 宋臨川王安石有重建許旌陽祠記 明宋濂

鎮蛟靈柱頌

序有豫章郡鐵柱二旌陽令南昌許遜敬



之鑄以鎮蛟者也郡地濱于江水蟲騁妖故民多江  
禍旌陽與西安吳猛世雲用正一斬邪三五飛步之  
術追殲其妖於長沙復懼遺孽潯興使工冶鐵柱壓  
其窟穴一在西山雙嶺南湮沒已久一在牙城南井  
迄今猶存柱出井外僅尺下施八索謂能鈎鎖地脉  
云唐咸通六年節度使嚴譔來為郡將發視之未及  
咫尺烈風雷雨江水暴溢譔恐而止其見于道家書  
者如此瀟竊聞之周有壺涿氏

秋

官掌取水蟲若欲殺

其神則以牡棹午貫象齒而沉之則其神死淵為陵  
神謂龍岡象之屬是也古盖有其術矣矧單陽則飛  
制以重陰乃伏而不動鉄陰而蛟陽者也斯柱之建  
其亦沉棹象之遺意歟於戲豫章之民與蛟不兩立  
微旌陽西安民其魚矣瀟不敏謹狗郡守葉君琛之  
請勒文柱下以頌神功於億萬載頌曰吳楚合城翼  
軫分經南昌鉅都蛟孽所庭味攘波涌雕運濤縈夫  
諸獸驗胜遇禽微沈竈龜產蝸阜泓成靈伯應歷鬼

憲宣刑獄錄三辰斗劍七星揮斥電戰剗割霆升河  
青黑廓川液紅星軌妖設鎮冶金建楹祝融主燄關  
伯司型八神錫羨五官儲精上旋圓樞下鍵方局溟  
妃捧鑑淵后持衡颯笙鶴瀨月吹鳧汀仙旌迴紫童  
節流青玄勛潛湯素牒晶熒龜山鐵絙龍鼎文銘翊  
扶鴻宰幹運清寧泰山可礪靈柱弗傾 明胡儼云  
豫章鐵柱歷代名賢多有題詠熊朋來詩曰九州失  
貢金司空不行水蛟龍弄波濤魑魅入城市吁嗟清

談晉萬事漫不理遂令千載人稽首旌陽子正言反  
應詞簡意高虞學士詩曰老龍無意弄新波化作鳧  
翁倚柱歌點石神方寧復得沉沙遺戟不堪磨汾陰  
鼎鼎千年出海底珊瑚百尺過誰在蓬萊期劫外下  
騎黃鵠一摩娑此詩初出人皆未喻其旨公曰此柱  
未敢必為旌陽之物故詩皆設疑詞以問之鐵柱詩  
雖多獨熊虞二公之詩超于衆作 陸文裕公深云  
鐵柱宮之東南隅方丈堦池作石欄檻鐵柱在馬相

傳為許旌陽治蛟之物甲午冬初余與同僚偶往俯  
觀焉微露其端乃石耳非鐵也亦不作柱形豈厭勝  
所為與 宋臨川謝逸鐵柱詩豫章城南老子宮塔  
前一柱立積鐵云是旌陽役萬鬼夜半鼻來老蛟穴  
挿定三江不沸騰切勿搖撼坤軸裂蒼苔包裏鱗皴  
皮我欲摩娑肘屢掣旌陽挈家上天去只留千尺應  
門戶西山高處風露寒茲事恍惚從誰語安得猛士  
若朱亥袖往橫山驚北部 廬陵劉辰翁詩海市蜃

樓十萬家支祁從此罷騰拏偶留封植一柱觀慎勿  
飛揚博浪沙壯士釗身翻水赤都城駕手射潮邪要  
知此老神功妙大地千年一繫槎 胡應麟曰許旌  
陽得道贈遠祖由玉虛僕射曾祖琰太微兵衛大夫  
先祖玉太極把業錄籍典者父肅中嶽仙官賜所居  
宅曰仙曹左府右官皆天帝所令今人但知旌陽拔  
宅事不知許仲武逃堯後復有此贈未審天上玉虛  
僕射較地下九州長何似耳 真君與郭璞訪名山

求善地為棲身之所得西山之陽逍遙山金氏宅遂徙居之今逍遙福地玉隆萬壽宮是也 宋徽宗政和中感真君入夢授藥愈瘡詔洪州改修玉隆萬壽宮建炎中金人寇江右欲火宮庭俄而水自楹桷間出火不薰苗長大驚為記其事而去時天會八年正月初二日也 傳顛名得一乃鐵柱宮道士往來臨江之新淦踪跡莫測夜坐風雪中鼻息如雷人咸以顛目之淳熙元年召對德壽殿賜號靈寶大師光堯

贈以詩云有客東來欲試茶倦投松石坐歌斜暗香  
一陣連風起知有薔薇澗底花江文忠公萬里有御  
製詩跋大畧言太上文奎寶篋賁於方外之臣喬雲  
絢采圓月騰輝則此詩盖光堯親書扇以賜之者一  
時宰臣史皓大參范成大儒臣朱熹皆有贈得之詩  
朱絕句云到處逢人說傳顛相看知是幾生前直把  
北斗傾銀漢去作龍宮第二仙史丞相詩不足觀遂  
不錄 左克明豫章道士也寓鐵柱宮所輯古樂府



自三代至陳隋溯流窮源妙契作者之旨太和劉冢  
宰崧有寄鐵柱宮左鍊師詩紫霞樓上左仙翁不在  
南塘在玉隆虛閣飛鳧雲影外亂山騎虎月明中銅  
駝荆棘秋風落鐵柱波濤海氣通別後玉簫渾少聽  
令人長憶萬年宮 宮中舊有鐵柱延真語錄彙編  
道士熊常靜所輯前後詩集大學士朱善為序常靜  
師事左克明彙編蓋左克明未竟之書而常靜成之  
紫極宮 在惠民門外晉建唐天寶書額內有吳絳鸞

寫韻軒 真仙通鑑曰吳綵鸞不知何許人或曰吳  
猛之女也唐太和末書生文簫客鍾陵西山其俗以  
中秋為許旌陽上昇日士女羣集游帷觀簫亦往觀  
焉見一妹歌曰若能同步陟仙壇應許文簫嫁綵鸞  
自有綉繡并甲帳瑤臺不怕雪霜寒生大驚異因伺  
之夜分姝與三四輩告別獨秉燭穿大松去徑盡陟  
山捫石冒險而昇焉生以潛躡其後燭將盡有仙童  
輩持松炬迎之生因失聲姝回首曰非文簫耶曰然

妹笑曰吾與子數未合何太速生隨至山頂有儿案  
帷幄金爐異香侍衛甚嚴與生坐定有二仙娥各持  
簿書而前指江湖覆溺事生因徵其事妹不對生請  
益堅不得已乃告之曰此天機不合洩于子吾當為  
子得罪矣仙娥即去忽天地晦冥風霆震擊帷幄几  
案一時傾覆妹倉皇著衣秉簡叩齒肅容俯地待罪  
俄而風雲頓息星宿燦然有仙童自天而降持天判  
宣曰吳絳鸞以私欲而洩天機謫為民妻一紀遂與

生夜携下山歸鍾陵舊處生貧不能自贍妹曰君具  
紙筆我為寫孫恂唐韻運筆如飛日得一部鬻之獲  
錢五緡盡又為之將十載人稍有知之者妹與文簫  
潛奔新吳縣藥王山側鄒舉村中一日題詩壁間別  
鄒舉云一班復一班隱入藥王山世數今逃盡烟蘿  
得再還簫聲凝露滴鶴翅接雲閒一粒主人藥服之  
能駐顏夫婦各跨一虎入藥王山而留仙丹一粒遺  
舉服之亦得却老今洪城南紫極宮寫韻處為寫

韻軒是也 元虞伯生集寫韻軒記畧云隆興紫極  
宮寫韻軒高據城表西山之勝俯瞰長江間乎民  
居官舍之中特為曩絕秋高氣清望見上游諸郡山  
若臨江之玉筍撫州之太華寸碧天際森列戶牖他  
處之所莫及也世傳吳絳鸞寫韻於此軒以之得名  
余昔在圖書之府及好事之家徃徃見其所寫唐韻  
凡三四本皆硬黃書之紙素方潔界畫精整結字適  
麗神氣清明要皆人間之奇玩登斯軒而想其丰采

亦足以寄遐思也乎 虞集詩仙人本自好樓居偶  
下重簾寫韻書最愛夜寒天闕近碧牕留得玉蟾蜍  
宋洪朋詩紫極宮下春江橫紫極宮中百尺亭水  
入芳洲界玉局雲映連山羅翠屏小楷四聲餘翰墨  
主人一粒盡仙靈文簫綵鸞不復返至今神宇夜冥  
冥 劉會孟記畧云寫韻軒雖江山明麗而棟宇雕  
殘加以俗書滿壁類無不愧文吳二才子者後十六  
年余自廬山還過之則殿角如飛高出廊右前欄俯

月澄景內涵中分為三官之祀謂吳氏故司江湖水  
官附焉于是祀三官猶二仙云 會孟又云凡吳氏  
唐韻皆反覆作葉子書朱墨分部精楷婉麗開玩如  
新近年猶有數本尚存世人不能效也 緒按陸務  
觀云永康軍導江縣有迎祥寺藏唐女貞吳綵鸞書  
佛本行經計六十卷吾郡知有唐韻而不知有佛本  
行經雖博聞強識如伯生亦未曾及此 清隱堂在  
紫極宮內元時道士余永在建永和數傳至玄谷道

人余天熙創太古樓幽雅冠於郡城吳文正公澄過  
豫章輒造其地與聚談信宿不厭是時道士共七派  
惟玄谷一派最勝故其徒多有聞於士大夫間餘六  
派則盡泯泯矣 唐玄宗有親書紫極宮額載天下  
金石志宋徐鉉有紫極宮石鐘銘皆此地之佳話也  
文昌宮 舊在城內明鍾翰王仲序詩云國祀元皇禮  
有餘紫雲古殿近清虛文光上接三台位星象中分  
六府居喜有神仙司桂籍諒無名字灑瓊書今來亦



欲從君去白鷺沙洲共釣魚宮已久廢僅此詩存耳  
萬厯間中貴潘相重建宮於磨子巷丹楹雕題頗稱  
秀麗

玉清觀 在進賢門外水次倉口宋慶元二年九江道  
士黃自然來此有道術善療疾疫京丞相鏜捨園為  
立觀祀玄帝

建德觀 在易俗坊晉咸和間建相傳南嶽紫虛元君  
魏華存修真處觀後塘內有魏夫人丹井井上有亭

亭舊藏玉皇天尊各像皆金銅物僧道義復建月濤  
庵於側文士每盤桓而偃息僧亦延款不倦也

妙濟觀 在蓼洲元至正二年建觀右有許真君咒劍

丹井

觀音閣 在進賢門外 弘緒詩琉璃燈影在人世幾

滄桑草樹天無際江山鳥獨忙僧閒龍隱鉢寺古鴿  
棲梁記得停船日風吹茉莉香

玉虛觀 在德勝門外祀玄天上帝元至正壬辰年兵

燬道士載真空重初永樂中學士曾祭有記

純陽觀 在進賢門外陳仲舉祠左宋建崇禎間重修

明熊公明遇詩東臯朝日近迤北白雲天犬吠仙  
源裏鶯啼道院邊石壇苔色古松塢月華鮮聞道純  
陽子曾經此探玄

新關聖帝君廟 在大成坊右最稱雄偉後為閣以奉  
觀音大士廟外左右坊額曰仁至義盡弘緒有特建

碑記 漢前將軍假節鉞督荊州事漢壽亭侯姓關

氏諱某字雲長小字長壽河東解梁人漢靈帝中

平元年帝君奔涿郡依先主率校尉鄒靖討黃巾賊  
獻帝初平元年隨先主討董卓建安元年隨先主拒  
袁術五年封漢壽亭侯十二年先主奔江南帝君統  
舟師屯于樊口先主與孫權將周瑜共拒曹操於赤  
壁破之帝君隨先主追操至南郡十四年先主領荆  
州牧以帝君為盪寇將軍襄陽太守十六年先主入  
益州帝君與諸葛亮張飛趙雲等鎮荊州十九年先

主以帝君督荊州事召諸葛亮等引軍會成都是時  
先主領益州牧二十年帝君在荊州與孫權將魯肅  
相拒二十四年七月先主稱漢中王以帝君為前將  
軍假節鉞八月出師圍曹操將曹仁于樊又遣別將  
圍呂常於襄陽十月曹操使其將徐晃救樊孫權使  
其將呂蒙襲江陵十一月引兵南還保麥城十二月  
被害卒於漢鄉 漢後主景耀二年追謚忠義侯宋  
徽宗崇寧元年追封忠惠公四年加封崇寧真君大

觀二年加封武安王宣和五年加封義勇武安王高  
宗建炎二年加封忠義義勇王淳熙十四年加封英  
濟王明成化十七年封崇寧義勇武安王萬曆十年  
封協天大帝四十三年加封三界伏魔大帝神威遠  
鎮天尊關聖帝君 帝君常云日在天之上普照萬  
方心在人之中以表丹誠又云願天帝生好人願人  
常行好事大哉言乎當與六經相表裏矣

月城關聖廟 在北門月城內承平時郡人皆於此中

祈禱歲無虛日 弘緒謁闕聖廟詩中天懸赤日亘  
古照丹心漢鼎因增重明封孰敢侵鐵衣三界望汗  
馬百魔欽蘋藻尋常供公前倍覺蒼 不負長髯曳  
千秋孔與君華夷名遍震義勇鼎三分魚鼓傳耆老  
鯨鐘響夕曛遙知禪悟處刀影冷層雲 瑣屑吳仇  
事高懷芥蒂空偏安虛壯畧護國凜英風婦孺魂頻  
懾牲醪久愈崇肅然瞻拜處仙佛仗神功

城西北闕聖廟 在撫院公署傍巡撫兵部侍郎兼都

御史蔡公士英建學使黎元寬有碑記文甚奇崛刻  
廟中

蓼洲關聖廟 按吾郡祀帝君於郭外新城門外濱江  
廟為最古蓼洲則醮商所建廣潤門外則居民所建  
然以地狹俱不免湫隘未若郭內之巍莪也 帝君  
籤有東坡解碧仙註而占驗僅存一二條殊為缺漏  
鄙意以郭外諸廟為舟車叢集之地廟各置簿題曰  
占驗增補令往來人各以其所見所聞之靈異者備



書之每數歲延文士潤色附入占驗之下亦闡揚之  
快舉也他處俱可以此推行之

馬王廟 在順化門內前祀馬王之神後祀關聖考周  
禮馬祖為房星其所祭先牧則始養馬者俱未嘗以  
王稱此稱為王者或曰馬鳴王或曰釋迦之馬鳴大  
士或曰道家之馬師皇俱不可考始仍其舊稱以告  
虔焉可也弘緒有重修募疏

江東廟 在廣潤門內神姓石名固秦世賴人漢灌嬰

擊南越神降絕項峯告以克捷之期已而功成因祠  
祀之宋隆祐太后駐蹕於贛金人深入至皂口彷彿  
見神擁陰兵護衛前後靈應甚衆備載贛州江東廟  
宋瀛記吳揚溥時封神為昭靈王宋封至崇惠顯慶  
昭烈忠祐王元三易封為護國普仁崇惠靈應昭烈  
忠祐王紹興志云江東廟在城東北三里神姓石名  
因秦世贛人廟食於贛江之東漢陳嬰討南越神以  
捷聞此廟起之始按此則擊南越者乃陳嬰非灌嬰

也大梁趙與時賓退錄亦云江西郡縣城隍人多指  
為灌嬰其實不然友人蕭大年攷功臣侯表始知為  
陳嬰蓋嬰自定東陽為楚將項羽死屬漢定豫章浙  
江封崇邑侯都浙流俗所傳不為全無所據但誤其  
姓耳與時之言與紹興志脗合存之以備參攷

文孝廟 在章江門外祀梁昭明太子蕭統昭明既薨  
長子歡應嗣位武帝捨嫡孫而立其第三子晉安王  
綱是為簡文帝止封歡豫章郡王後薨於江州謚曰

安及簡文見廢侯景矯詔奉歡子棟即帝位棟方與  
妃張氏鋤葵而法駕奄至驚不知所為泣而升輦未  
幾改號天正加昭明太子為昭明皇帝安王為安皇  
帝或曰後梁岳陽王譽稱帝江陵時所上尊號譽蓋  
昭明帝三子也臣於魏魏屯兵江陵守之傳歸琮二  
主至陳後主禎明元年為隋所滅盧志不知天正改  
元已有追尊昭明之事輒謂譽歸魏自立始尊統為  
皇帝豈未讀南北史耶江右南康與金陵俱有廟祀

昭明其題額曰文孝 昭明字德施小字維摩武帝  
之長子也生而聰睿三歲受孝經論語五歲遍讀五  
經悉通諷誦性仁孝自出宮恒思戀不樂帝知之每  
五日一朝多便留永福省或三日五日乃還宮其母  
丁貴嬪有疾昭明朝夕侍左右衣不解帶及薨步從  
喪還宮至殯水漿不入口每哭輒痛絕武帝勅中書  
舍人顧協宣旨曰毀不滅身聖人之制痛不勝喪比  
于不孝有我在那得自毀如此可即強進飲粥昭明

雖奉詔勸偪終喪日止一盂不嘗菜果之味體素壯  
腰帶十圍至是減削過半每入朝士庶見者無不下  
泣所著文集二十卷又撰古今典故文言為正序十  
卷五言詩之善者為英華集二十卷文選三十卷

按後梁稱帝江陵中宗睿享國七年世宗歸二十三  
年莒公琮一年艱晚於周齊分據陳隋擾攘之秋竟  
能保有叢爾至三十餘年不可謂非昭明之德澤也  
王仲淹帝魏頗為縫掖所譏若以睿繼湘東至開皇

七年梁亡始大書隋高祖年號而以統屬之於南或亦筆削之一義與棟為武帝嫡孫其嗣位甚正但屬侯景推戴遂不克令終然進帝昭明實出自於棟耳黃司空廟 祀陳司空黃法氈萬厯間太守范涑重修府同知黃在表記 法氈字仲昭新建人少勁健有胆力步行日三百里距躍三丈梁侯景之亂於鄉里合徒衆太守賀翊下江州法氈監知郡事陳武帝討侯景令周文育屯於西昌法氈遣兵助文育屯新淦

縣侯景黨於安慶分兵來襲新淦與戰却之進克笙  
屯俘獲甚衆敬帝即位封新建縣侯割江西四郡置  
高州以法氈為高州刺史鎮巴山廣州刺史蕭勃遣歐  
陽頽來攻法氈拒戰頽敗走及武帝踐阼入陳以破  
王琳擒余孝頃功授平南將軍開府儀同三司又與  
周迪共平熊曇朗功最大天嘉中周迪反率兵會都  
督吳明徹討迪於上塘誅之明徹拜都督江吳二州諸  
軍事鎮南大將軍江州刺史廢帝時大舉北伐以法



甄為都督出歷陽齊遣將來援禦于大岷破齊軍盡  
獲人馬器械遂克歷陽進攻合肥降之加侍中改封  
義陽郡公累遷都督以功大故祀之

孚應廟

額佳山  
福地

在修仁坊相傳唐隱士崔姓自汾寧遊

至此值城中患疫隱士以丹擲井折柳示人汲飲病  
者即愈井在今清平坊之上街所著有入藥鏡一篇  
載道書勅封佳山孚應侯廟久廢萬歷間迭建額曰  
佳山福地或云神晉人崔姓子玉其名唐憲宗得奇

疾諸醫不效忽有道人賣藥於市一粒而愈問其姓名曰臣豫章人崔姓俄不知所往遣使覓之乃於此地得崔公祠詔封英烈侯與前所載不同並存之

黃谷瑣談云永青山有大王廟廟額云西齊護國王人不知何神也攷東嶽懺曰岱嶽顯聖威靈護國西齊王崔府君則固嶽神位下第一護法也府君名子玉隋大業三年六月六日生唐貞觀時為鼓城令據此則神乃貞觀時人與典午氏無涉吾土或亦以東嶽

輔佐之故而祀之耳 廟內舊有古槐載范涑志

藥王廟 在文昌宮右

火神廟 在磨子巷祀熒惑星君萬曆間建

白馬廟 在府學左祀際真護法白馬忠懿侯王神產  
分寧兄弟三人從許旌陽斬蛟二兄已被害忠懿奮  
勇而往卒擊殺蛟豫章為立廟祀之

三聖廟 在廣潤門外祀白馬神兄弟頃乙未歲四月  
初三日夜半烈風雷雨廟祝見怪自江中來目光如

炬水湧起丈餘漸近石堤祝急鳴鐘籲神廟中隱隱作叱咤聲怪遂奔回揚子洲石堤賴以無損

陳司徒廟 在進賢門外徐孺子墓傍去祠濱江之南

二十里有高風廟亦祀司徒 陳蕃字仲舉先為青

州樂安太守郡人周璆高潔之士也前後太守召俱莫肯至惟仲舉能致之字而不名特設一榻去則懸之後左遷豫章復以此施之南州高士徐穉仲舉所虛心折節惟此兩人至大將軍梁冀威震人主遺書

詣蕃有所請託輒不得通使者詐求謁遂笞殺之其  
加禮韋布而不畏彊禦如此稱為天下義府豈徒然  
哉 范史載周璆事於仲舉傳而豫章設榻則載於  
徐孺子傳中讀者往往失於參攷遂專以屬之孺子  
耳

溫忠武公廟 在進賢門外居江之濱祀晉江州刺史  
溫嶠南昌胡儼有記俗誤以為祀司馬溫公遂稱司  
馬廟至今未正其訛

唐忠烈祠 在章江門外祀顏常山魯公兄弟俗稱大

王廟相傳魯公為監察御史辨冤獄於五原遂致甘

霖故建祠以禱水旱兼嘗歷饒州刺史吉州司馬此

亦其過化之地也祀常山當以袁履謙配祀魯公當

以李萼配海內祀三顏者須以吾言告之 魯公貶

吉州司馬時日與詩人文士倡酌為樂世傳有廬陵

集十卷

章江廟 一名沛澤廟在新城門外祀郡人漢章文以

其獻地築城佐灌將軍而有功于吾土也宋大觀中  
祈禱甚靈賜額沛澤廟廟傍隙地數武僧幻修建準  
提閣萬時華為作募疏

澹臺祠 在府學前大成坊萬厯中巡撫都御史四明  
王公佐特建以祀澹臺先生郡大夫士講學肄業其  
間每有地方公務亦於此祠商酌月有講會有文會  
公議移豫章館諸鄉紳所貯金買田以濟會費因置  
伍諫鄉安豐莊田五百二十四畝每歲管祠郡大夫

士輪掌無與在位事天啟末逆閣魏忠賢斥賣郡國  
書院助水衡錢此祠亦在賣中業已有售之者至曳  
澹臺先生像投于江濱崇禎初烈皇登極首殛大璫  
特旨復諸祠太守彭期生奉澹臺主以歸諸廢悉皆  
振舉甲申後講席忽化為廐舍巡撫兵部侍郎兼都  
御史蔡公士英見而嗟呀盡驅後垣之鳩居者遂傾  
囊金召匠作葺舊祠而新之同藩臬諸公延請郡大  
夫黎元寬暨陳弘緒課士其中復設處百金買田一



百畝以佐膏火巡撫兵部尚書張公朝璘復捐囊重  
修懸示以止使車假寓甚力歲戊戌黎與弘緒懇辭  
祠務至再至三遂以田盡歸南昌府儒學詳具黎澹  
臺祠紀畧中 大司馬熊明遇少宰熊文舉並有祠  
記督學楊兆魯有澹臺祠款約 祠舊有塑像塑工  
以意為之按李龍眠畫七十二子像滅明猛毅甚于  
子路夫子所謂失之子羽者謂其貌武而行儒耳

同仁祠 在洪恩橋祀明都御史孫燧副使胡世寧許

達都御史王守仁知府伍文定御史唐龍凡六人皆  
正德己卯宸濠之變前後殉難及戡亂之諸臣也萬  
厯間知府范涑重葺知府盧廷選再修之新建丁此  
呂撰祠記

褒德祠 在南浦驛南香巷祀巡撫江西都御史夏公  
良心萬厯二十九年建有特賜祭田

陸公祠 在德勝門外水晶坊祀巡撫江西都御史陸  
公萬垓萬厯間建祭田二十六畝七分餘大學士張

公位撰祠記

江城名蹟卷三

欽定四庫全書

江城名蹟卷四

新建陳弘緒撰

證今二

滕王閣 在府城西臨章江唐顯慶四年滕王元嬰都督洪州時建後都督閻伯嶼九日大宴宿命其婿吳子章作序以夸座客時絳州王勃省父交趾道出江西先一日次馬當去洪州七百餘里遇中元水府神

以天風助之詰朝抵城下與宴閣公出紙筆徧請客  
莫敢當王勃慨然不辭閣公怒起更衣遣吏伺其文  
有句輒報及得落霞秋水之句乃矍然曰天才也請  
遂成之極歡而罷元和中袁州刺史韓愈有重修閣  
記記稱三王文詞即勃與王仲舒記王緒賦也大中  
間閣燬觀察使紇千衆重建韋慤記宋大觀元至元  
元統間累修前後撰記者左丞范致虛直學士姚燧  
學士虞集也明壬寅春正月高皇帝幸龍興開宴閣

上命儒臣咸賦詩縱觀燈火懼遊連夕守臣檻陳友  
諒所蓄白鹿至命放之西山景泰間巡撫都御史韓  
雍因閣舊址築而廣之額曰西江第一樓萬曆二十  
七年巡撫都御史夏良心勅新閣於其右面直西山  
額曰高閣臨江崇禎間巡撫解學龍拓其臨江者而  
新之額曰環漪閣屬萬時華陳弘緒輯歷代詩文刻  
滕王閣集改革之際閣燬於兵順治十一年巡撫兵  
部侍郎兼都御史蔡公士英捐貲重建定為西向以

攬江山之勝公自為記復徧徵海內詩文并前集彙刻之板藏按察司公署 王子安九歲時得顏師古

注漢書讀之作指瑕以摘其失十三作滕王閣序

楊升庵引三國典畧曰蕭明與王僧辨書凡諸部曲並使招攜赴投戎行前後雲集霜戈電戟無非武庫之兵龍甲犀渠皆是雲臺之仗唐王勃滕王閣序紫電青霜王將軍之武庫正用此事以十三歲之童子胸中萬卷千載之下宿儒猶不能知其出處豈非間



世奇才杜子美韓退之極其推服之良有以也 明

柴惟放曰姚鉉選唐文不取滕王閣序蓋其全集不入排耦之文及詩賦亦不入排律律詩則王勃之作原與選之意不合也 宋王介甫詩白浪翻江無已時陳蕃徐孺去何之愁來徑上滕王閣覆取文公一片碑詩意似不滿子安閣序蘇子由亦有排語終倉猝之句不獨見刪於姚鉉也 王子安唐時人如杜牧張喬曹松皆有滕王閣詩又李涉絕句云滕王閣

上唱伊州二十年前向此遊半是半非君莫問西山  
長在水長流全首不事雕鏤而自然悽婉固是晚唐  
翹楚 宋范成大云余至南昌登滕王閣其故基甚  
侈今但於城上作大堂耳榷酤又借以賣酒珮玉鳴  
鑿之罷久矣其下江面極濶雲濤浩然按石湖詩南  
渡時此閣乃在城上錄之以識滄桑 廬陵文公天  
祥詩五雲窻戶瞰滄浪猶帶唐人翰墨香日月四時  
黃道濶江山一片畫圖長迴風何處搏雙雁凍雨誰

人駕獨航迴首十年此飄泊閣前新柳已成行此詩  
一字不襲子安序而雄渾蒼勁直與少陵頡頏 宋

王平甫安國詩滕王平日好追遊高閣依然枕碧流  
勝地幾經興廢事夕陽偏照古今愁城中樹密千家  
市天際人歸一葉舟極目烟波吟不盡西山重疊亂  
雲浮時平甫年亦十三郡太守張侯見而異之為啓  
宴張樂於其上 劉敏求字好古太和人號松菊老  
人題滕王閣云閣中環珮知何處帝子不來春欲暮

鶯鳴烟柳樹搖風疑是當年舊歌舞古來興廢君莫  
嗟君看西山紅日斜西山不改舊顏色換盡行人與  
落霞山谷稱賞再三以此知名 宋僧洪覺範有同  
世承世英世隆三伯仲蔡定國劉達道登滕王閣詩  
云承英連壁光照座更著阿隆如鼎安老兵先馳啓  
關鑰西山奔走登欄杆劉郎端默自凝遠蔡侯奮髯  
齒牙寒但餘衰老百無用搜句倚欄方細看所謂承  
英三伯仲者乃郡城吳氏之子覺範集有次韻寄吳

氏兄弟詩其畧云朱門連屬南昌郡東湖褒賢拔高  
峻西山捲簾入欄楯富貴遮人不容進我初見之不  
敢瞬吳家諸郎特風韻戲語嘲之終不愠筆峯落處  
風雷趁合覺範二詩觀之承英伯仲自非凡兒而郡  
志逸其名無從索之於緗素矣 元虞文靖公集嘗  
宿寫韻軒辛好禮諸才子侍因進問曰西江登眺之  
所據江山之勝無踰於滕王閣望湖亭二處公不知  
其幾過皆不留題何也虞曰諸公曾見東坡及僧晦

機二詩否請與諸公誦之晦機滕王閣詩云檻外長  
江去不回檻前楊柳後人栽當時惟有西山在曾見  
滕王歌舞來其第一句言往事不可問也第二句言  
檻前楊柳亦是後人所栽第三四句謂當時曾見滕  
王歌舞者惟有西山在耳含蓄無限之意寓無窮之  
感東坡望湖樓詩云黑雲翻墨未遮山白雨跳珠亂  
入船卷地風來忽吹散望湖樓下水如天陰陽變化  
機關開闔於頃刻之間且氣雄語壯所謂吞雲夢者

八九二詩皆不可及是以不曾有題明日虞與諸公  
登滕王閣即席賦詩若干首但記其三律與一絕耳  
其一曰高閣城頭戶牖開江中照見碧崔嵬文章誰  
復三王後雲氣長從五老來畫角數聲南斗落白鹽  
萬斛北風回洲南先有蛟龍窟怪得詩成急雨催其  
二曰天寒江閣立蒼茫百尺欄杆送夕陽歲久魚龍  
非故物春深蛺蝶是何王帆檣星斗通南極車蓋風  
雲擁豫章燈火夜歸湖上雨隔鄰呼酒說干將其三

曰危樓百尺倚欄杆滿目青山不厭看空翠遠凝江  
樹小落霞飛送酒杯乾千年劍氣凌牛斗半夜天香  
下廣寒我欲乘鸞朝帝闕五雲深處是長安絕句云  
豫章城上滕王閣不見鳴鑿佩玉聲惟有當時簾外  
月夜深依舊照江城昔人云詩不可以苟作觀公之  
意可見矣此胡祭酒自謂得之吳用中云 文靖又  
言幼過豫章見滕王閣扁吳傳朋公所題也徘徊顧  
盼嘆其深穩端非近代所能及 洪玉父舍人有



侍兒名曰小九知書能為洪檢閱洪甚愛之嘗月夜  
攜登滕王閣賦詩云桃花浪裏散花樓南浦西山送  
客愁為理伊州十二疊緩歌聲裏看洪州後因兵亂  
失之洪悵恨不已又和前詩云西江江畔見江樓江  
月江風萬斛愁試問海潮應念我為將雙淚到南州  
已而洪復尋得其人為賦珠還合浦絕句十章 明  
胡儼有閣賦曹學佺有七言古並稱佳作俱以篇長  
不能盡載布政使陳文燭雨中登閣詩云飛閣濛濛

雨氣涼開樽風送百花香春深草色同鸚鵡江遠濤

聲到鳳凰

鳳凰章江灘名

帝子豪華流水逝昔人麗藻落霞

長誰言勝地逢難再喜得高朋數舉觴在衆作中此

為探驪之珠矣江文忠萬里韓記跋云唐之文三

變而至韓韓之文一倡而遂古締章繪句如王所為

則其未變時也未變之作雖先焉已有自我作古者

突過其上孰能為先於古也哉萬里被命來洪敬取

韓記大書特書之居中正位以示森嚴而沂沕穆王

也姑附見焉 豫章修滕王閣成監司舉落成宴于  
閣上吳康齋先生與弼便道偶過其下因書一絕云  
孺子亭空春草長忠臣祠老燕繁梁千門萬戶皆沉  
夢何事虛空畫渺茫蓋諷之也宴罷一廉訪見之訝  
曰此吳康齋先生筆隨命人追之已至謝埠矣強挽  
之卒不能返 萬首唐詩載白樂天絕句云翠幙紅  
筵高在雲歌聲一曲萬家聞路人指點滕王閣看送  
江州白使君吾郡餞送嘗以此當陽關三疊而傳誦

甚少詩亦有遇不遇耶 明黎遂球滕王閣夜別徐

巨源詩宋玉悲秋正黯然登臨送遠賦情牽半簾明  
月生高樹一縷微雲界淡天落水泛波舟趁葉浮燈  
接漢草如烟愁來我暫因風去高閣留君對昔賢遂  
球字美周番禺人多才藝而深信內典篤于聲氣每  
傾囊周人之緩急以薦授職方主事狗節於虔城虔  
城人合楊閣部廷麟萬司馬元吉姚侍郎奇胤龔驗  
封榮五人建祠祀之額曰五忠祠 嶺北參藩周公

體觀詩獨上滕王閣洪都勝勢開山連巴蜀遠江滙  
貢章來秋風吹城闕鄉心怯酒杯低徊辭賦客剩有  
仲宣才又賓筵開燕喜高閣集羣才勝地常如此王  
生安在哉江山傳藻麗棟宇繫徘徊聞有逍遙客丹  
書召不來蔡中丞彙刻告竣方得此詩遂不及載入  
因記于此 元趙孟頫書滕王閣序楊文貞為之跋  
萬歷間石刻則華林董宗伯其昌書崇禎間則王文  
學猷定書重建後則熊學博文登書昌黎記獨無佳

書斷碑卧苔蘚中剝蝕遂無完字 玉堂佳話云李

昇水墨滕王閣圖合幅上畫人物宴集甚盛又南唐

衛賢畫滕王閣景世稱工絕 宋郭忠恕有滕王閣

王勃揮毫圖載宣和畫譜 嘉靖初巡撫陳洪謨於

閣後建堂三間祀文文山謝疊山名曰二忠祠洪謨

詩云文章氣節兩堪傳前有三王後二賢自是忠貞

裨世教從來人物孕山川撐扶宋室誰能並崇祀江

鄉理則然蘋藻秋風瞻拜起巍巍北斗正高懸

攬秀樓 在布政司之左萬曆三十四年布政使陸長

庚王佐伐石築基建樓其上俯瞰雉堞蒼翠四圍長

江如帶城內之巨觀也臨川湯顯祖有賦 右使丁

繼嗣詩層層百尺瞰平蕪此日新成燕雀呼不盡岌

堯千障合却餘蒼莽萬花鋪風清月白時為主海濶

天高故是吾拄笏大觀難再得接羅狂倒莫須無

右使來三聘詩雄峙洪都百尺樓簷楹飛壓大江流

窗含萬井晴光麗簾捲千山爽氣浮吟嘯坐看庾亮

月登臨興入杜陵秋風帆沙鳥何須羨北倚欄杆動  
杞憂

鐘鼓樓 在府治東南東湖上廣濟橋之南舊樓在東  
湖之西洪武間圯乃移普賢寺鐘鼓樓於此萬曆十  
六年知府范涑復修後燬於兵巡撫兵部侍郎蔡公  
士英重建 萬司馬恭云豫章東湖之濱有岑樓焉  
崇可十尋博半之飛榭勒棟叢栝錯節聳東湖而臨  
西山若天柱焉不知何代所為風雨不圯霜雪不剝



巔懸大鑪故老傳說宋末所鑄大二十圍重六百鈞  
舉之三年不可上有神僧過焉罵曰何不上乃以其  
緇衣服之紐其端復罵曰上上于是百人舁之一躍  
及巔今紐端緇服猶在按司馬所謂岑樓即舊鐘鼓  
樓其上有銅鑄巨鐘乃南唐林仁肇施非宋末也

知府范涑詩共上高樓意若何樓中玉漏瞰金波雲  
霞半向疎櫺入蒼翠平臨遠樹多烟篆乍浮新棟宇  
鐘聲長滿舊山河凭欄問俗情無限不是尋常載酒

過

僕家樓 在府治西北元末僕列篋闔門死難有司徒  
其樓于城上為遊觀之所一作薛家樓嘉靖間巡撫  
都御史何遷取陶淵明山氣日夕佳之語更名曰夕  
佳樓布政使陳文燭有夕佳樓記 僕列篋字世德  
龍興人父文質官于江西遂家焉列篋由翰林出監  
海潮州有惠政罷歸民留之不得至正間紅巾亂藩  
臣檄掌東門之管既奉命往別道士陳白雲曰予世

為忠臣兵事不可測誓不辱國辱先請以身後為托  
歸具牲酒酌祖墓囑妻孥曰城倘不守爾等當即赴  
池井勿汙于賊城陷列篋遂投井死妻妾子女死者  
十有一人明日道士乃浚井竭池求屍具棺槨以葬  
聞者為之感慨 弘緒洪乘編遺云僕家樓既改名  
夕佳李少文嗣京司理吾郡為復舊名而置僕公木  
主于其中請於撫按春秋致祭列篋死難事已見盧  
志但其記兄弟五人名殊未詳覈蓋善著乃僕越倫

之子雖登第而不在五人之列五桂坊所表則玉立直堅哲篤朝吾并列簾而五人也五人皆僕文質之子長玉立登延祐戊午第次直堅登泰定甲子第次哲篤登延祐乙卯第次朝吾登至治辛酉第最少者列簾登至順庚午第盧乃遺朝吾而以越倫之子當之謬矣 明學使李夢陽僕家樓詩間遊北城隅俯視清江郭洪州帶名都形勢日相錯樓觀藹鬱鬱街巷紛以漠北城良已高况陟城上閣輕裳拂倒影飛

檻聆天樂春夕一何蒼夏潦彌井絡衝風擊迴流玄  
雲駭灘泊暗觀逝者危遂悟居者樂慷慨諒易感捫  
心果誰惡夷險非我為彈劍且盡酌萬時華詩朝  
登北城風怒號沙飛十丈寒雲高春鴻欲歸呼其曹  
樓頭歌管聲嘈嘈此地管絃朝復夕父老經過多太  
息城中少年那復知云是當年俠家室俠公生長自  
邊塵百花洲畔唵餘春秋風五桂散遙馥兄弟出入  
皆朱輪潮陽歸來遍紅巾翰林樹幟城東門堞摧櫓

折鼓聲死清池湛湛哀英魂從者妻子十一人葬者  
道士陳白雲東風花開鎖空宅狐啼鼠竄無朝昏僕  
家之樓夕佳額滄桑轉眼悲行陌凭闌風物誰獨存  
章流靜照西山色城邊擊鼓白日低明月光中烏夜  
啼游人醉舞公獨悲霜天客散颺朱旗一朝幸遇李  
夫子為汝拂拭揚鬚眉樓頭歌舞如昔時樓下木主  
公安之南州一片中華土節義晶晶亘今古後來孫  
許氣如虹日月河山共吞吐中原寇馬今復馳江南

江北多鼓聲公排帝閭叫閭闔為我擊賊綏蒸黎

新貢院 在進賢門內左布政使盧公震陽建并正學

書院旌忠祠及旁近居民而締造之前有塔峰後有  
俯城阜於形象最稱秀傑為堂于中曰至公為堂于  
後曰協一為房曰京考曰房考為所曰受卷曰彌封  
曰謄錄曰對讀曰供給為樓于前曰明遠為樓于四  
隅曰瞭高凡典故所應有者罔不釐然畢具焉熊少  
宰文舉有重建碑記

蔡公講堂 在章江門外縉紳士庶為巡撫兵部侍郎  
兼副都御史蔡公士英特建以識去思郡人黎學使  
元寬有記

京山堂 先少保清襄公初造先少保叅劾逆璫魏忠  
賢掛冠歸里囊無長物僅遺京山數椽旋以饘粥不  
給鬻其半於鄰居又一載而鶴繡之袍燕居之服亦  
盡質之于錢家笥中遂無餘衣棄養後米公萬鍾為  
更其題曰思堂以識不肖孤風木之痛而京山舊匾



則移之於前廳焉 傍曰見山樓藏書八萬卷予寢  
食其中丹鉛靡間寒暑乙酉仲夏盡為鳩居管卒散  
擲溝壑幸存二萬卷輦至寒崖擇抄本二千餘卷別  
貯之石室戊子兵變鐵騎捆載而去兼以居民攫取  
遂蕩然無復枕篋之貯而予亦欲漸去筆硯從事於  
無何有之鄉矣弘緒所自著而現存者周易備攷四  
卷詩經解義八卷石莊集六卷恒山存稿二卷鴻桷  
篇四卷敦宿堂留書六卷 崑齋詩集五卷山房讀書

跋四卷咫聞編四卷寒崖餘論六卷荷鋤雜志十一  
卷豫章藝考六卷南昌郡乘五十五卷自著而燬於  
兵者明文類抄一百二十卷諸經存疑四十卷楸窻  
冗記十二卷洪乘編遺十卷 熊吏部人霖見山樓  
雅集題詞云開言多煦社雨生寒花欲笑以還啼鶯  
怯飛而頻坐惟前草色有夢相通戶外履痕無風自  
掃舉頭見月快逢君子之光信足過門已入高人之  
室兄及弟矣莫遠具來子之好之不期而會寅階揖

客竹影低襟子夜分杯花光漾酒已而欲窮遠目更  
陟危樓楚火微紅點綴魚舫夜色峯嵐淺碧飛來城  
闕春陰况復爆竹響中忽紙鳶之高舉風茄聲裏乍  
火樹以橫披巷有康衢市無宵嘆斯則騷人之逸興  
狂士之深思良有不能自己焉者矣楚賦大風既多  
玖李瑤桃之報周詩小序聊為象瑜馬璧之光維昔  
丙子花朝後十日

放生池 在東湖之西唐光化二年都督張廷珪奏置

北海太守李邕撰碑文

百花橋 在東湖北岸地名百花洲宋紹興間張澄建  
亭匾曰講武以習水軍洲畔有橋即以百花為名况  
志寧詩講武亭前水四流遊蜂飛蝶滿芳洲西風戰  
艦知何處贏得斜暉伴白鷗又波光清淺玉虹橫過  
客誰題柱上名錦繡鋪張春色滿小車花外麗人行  
高士橋 在府城跨東湖以近孺子宅故名俗呼高橋  
萬歷初范使君涑易名躍龍又以近兩邑學宮也國

初中翰王仲序詩云橋列東湖隱素秋橋前故宅抱  
清流馬嘶波影青龍見魚戲簷陰紫貝浮題柱誰論  
支大厦濟川人意在南州臨分莫動河梁思把臂何  
年憶再遊

草鞋橋 在新城門外草鞋巷郡人胡文早喪其婦年  
少守節甚苦身自織布以給食頭面恒不梳洗足著  
草鞋鄰里從其夫姓呼為胡草鞋每令人持布至橋  
橋上人爭買之曰此胡草鞋夫人布不二價者也

李君子巷 在蓼洲宋有李生者逸其名南昌人好義  
樂施每歲稔積穀社困歉則和糴平準里人賴之世  
亂集義勇以衛一方紹興間李成寇饒置家洪州生  
瞰成出率衆戮其妻子成恨甚下令致生不然且屠  
洪州既得生錮之於火神廟縛繫手足繫于巨板寇  
環守之期以旦日剖心祭亡魂衆各熟寢至夜半忽  
火神插劍躍起剖生左右縛生執劍自開餘縛雞鳴  
走出城南從筠州入楚迎岳飛兵討成大破之飛表

生行軍長史不就人名其居為李君子巷

秋屏閣 在城北曾子固云豫章樓閣可盡西山勝覽

者惟秋屏耳 弘緒詩今古都消檻水聲後來何地

又飛觥霜風吹醒無邊夢恰見西山渡口橫

投書渚 在城西石頭渡殷羨投書於此 羨字洪喬

為豫章太守都下縉紳託羨致書者若干函行次石頭渡盡投水中曰沉者自沉浮者自浮洪喬不作致書郵其性之介如此

江城市蹟卷四